

Banjir kilat: 165 keluarga di 13 kampung dipindah

BALING 2 Nov. - Kira-kira 165 keluarga di 13 kampung dekat sini terpaksa dipindahkan ke lima pusat pemindahan setelah rumah masing-masing dinaiki air akibat banjir kilat setelah hujan lebat selama empat jam awal pagi ini.

Banjir yang berlaku kira-kira pukul 1.30 pagi itu menyebabkan kira-kira 50 rumah dinaiki air sehingga satu meter di kampung terbabit yang kebanyakannya terletak berdekatan Sungai Ketil.

Antara kampung yang terlibat adalah Kampung Kuala Kedua, Kampung Bukit Sebelah, Kampung Siput, Kampung Banggol Derum, Kampung Dusun Raja, Kampung Lahar, Kampung Nering, Kampung Pantai Teh, Kampung Haji Abas dan Kampung Sungai Batu.

Pegawai Kebajikan Masyarakat Daerah, Nazatul Iffah Abdullah berkata, mangsa yang membabitkan 35 keluarga itu dipindahkan ke lima pusat pemindahan dan rumah jiran berdekatan.

"Biasanya setiap kali banjir, mangsa akan ditempatkan di beberapa tempat yang telah dijadikan tempat selamat untuk mereka berkumpul bagi memudahkan bantuan barangan makanan disalurkan.

"Pemimpin setempat turut membantu bagi melancarkan urusan tempat pemindahan sekiranya berlaku tempoh pemindahan

yang lama. JKM juga telah menghantar bekalan makanan segera kepada mangsa yang terbabit," katanya di sini hari ini.

Katanya, terdapat mangsa yang sudah pulang ke rumah masing-masing pagi ini setelah air surut dan pihaknya masih memantau perkembangan mangsa terbabit.

Dalam pada itu menurut seorang mangsa, Idris Che Me, 61, dari Kampung Haji Abas, dia yang asyik menonton perlawanan akhir Piala Malaysia semalam terkejut apabila air tiba-tiba melimpah ke dalam rumah mereka.

"Saya terus mengejutkan isteri, Tengku Faridah Tengku Md. Akib, 60, dan dua anak, Mohd. Faizal, 34, dan Nor Syakinah, 21, untuk mengangkat barangan ke tempat yang selamat.

"Saya sempat menyelamatkan beberapa barangan penting termasuk alatan rumah, apabila air naik dengan cepat sehingga paras satu meter, kami terus keluar ke atas tebing untuk menyelamatkan diri," katanya.

Katanya, walaupun sudah lama banjir tidak berlaku di kawasan itu tetapi sekiranya hujan lebat berterusan selama empat jam di Mukim Siong sudah tentu paras air Sungai Ketil akan melimpah.

"Mujurlah tidak ada kejadian buruk semalam tetapi kepenatan apabila terpaksa mencuci rumah setiap kali selepas banjir," katanya.

